

Ursina Trautmann, Luca Maurizio ed Asa S. Hendry

Surdada dal Premi grischun da litteratura

MARTIN CABALZAR/FMR

■ **Ursina Trautmann, Luca Maurizio ed Asa S. Hendry è vegnid(a)s undrad(a)s cun il Premi grischun da litteratura 2021. La surdada ha gi lieu ier en la biblioteca privata da la Chasa von Spreacher a Maiavilla.** Pervi da las circumstanças da corona è l'act festiv ludic-litterar, moderà en trais linguas dal cabarettist *Flurin Caviezel*, vegnì emess via livestream da RTR e da Somedia. Cun curtas prelecziuns ni produziuns han las undradas e l'undrà intermedià in schatg da lur vast spectrum litterar che tanscha dal roman sur texts poetics e dramaturgics fin ad artitgels schurnalistics. Ad ina laudatio sco usità èsi vegnì renunzià.

La cuntinuitad è garantida

La Fundaziun Premi grischun da litteratura – che è vegnì fundà da la Soroptimista Milly Enderlin – ha surdà quest onn per la 23avla giada ina distincziun per persunas che è sa fatgas meritavlas sin il champ da la litteratura en il Grischun triling. Per

la segunda giada è il premi dotà cun 10 000 francs vegnì repartì quest onn sin trais persunas. Sco quai che la presidenta da la Fundaziun Premi grischun da litteratura *Anna-Alice Dazzi* ha menziunà resguarda il premi da quest onn «la varietad linguistica e litterara da noss chantun triling en tut sias furmas d'expressiun, numnadain texts scrits ed orals, poetics e satirics, romans e chanzuns, teater e texts schurnalistics – e quai en furma tant analogica sco digitala.»

Damai ch'il chapital da fundaziun è uss absorbà entirain èsi ditg stà intschert, schebain i dettia ina cuntinuitad. Il cussegl da fundaziun en carica che consista da la presidenta *Anna-Alice Dazzi*, *Cristina Maranta*, *Marcella Pult* ed *Arno Caluori* aveva annunzià sia demissiun en corpore. Sin iniziativa da *Köbi Gantenbein*, il parsura da la cumissiun chantunala da cultura ed editur da «Hochparterre» èsi reussi da recaltgar daders per garantir la cuntinuitad, almain per ils proxims onns. Sia finamira è da recaltgar 100 000 francs per pudair garantir il premi per ils proxims 10 onns.



Asa S. Hendry durant la prelecziun via livestream.

FOTO RTR

Las trais persunas undradas

Asa S. Hendry survegn il premi per ses emprim roman remartgabel «Sin lautget» en lingua rumantscha che tracta da maniera poetica e cun gronda sensibilitad ed intelligenza tematicas fitg sensibilas ed actualas.

Luca Maurizio chantatur e cabarettist da lingua taliana e bregagliotta, survegn il premi per il tun poetic da sias chanzuns e per la satira lucida da la societad che s'exprima en sias preschentaziuns divertentas e murdentas.

Ursina Trautmann survegn il premi per sia activitad litterara multifara ed engaschada en lingua tudestga che va da la dramaturgia al schurnalissem.